

Pier e ləl krəkrə ek'awŋ **Ów ek'it eke wəl k'uw any**

Bwo el Pier ee? Pier el Jesu ec'erm esel ləw yony a eke sɔsum ot ab em ec'anymu. Pier, Grək em a nin, etŋ ow e nyandrə el "Lob". Jesu in obi ɔŋ'n nin na. Ebre em e nin e l'ij a el Simɔ. Pier el Galile wus af ec'egŋ; in e baŋn a el Betsayida (Jan 1.43). In lele lisijim Andre ab, Galile ec'okij ab em -li b'ok muw. Gbəkɔ eke Jesu esŋ el a, -l'igŋ muw ok a -l'elu es etŋ -l'us ow jam. Sica eke Jesu uyu afr a, Pier ɔb in ec'Amani Mamn a e kokoba Jerusalem, Jude wus ab af lele Samari wus ab af ab. N'im toŋ l'ok Rom; yogŋ anake wəl ew'r olikŋ af ke l'uw a.

Ləl na em, Pier am dad eke Silven eke emeny wəl b'esŋ Silas a anake in el in eci ləl nɔn es a (5.12). Pier nɔn ləl na "Babilɔn" (5.13). Ke Rom ana. Ni nɔn ləl a n'am awŋ agŋ a fəŋ eke ɔny ɔmn Krist em, ke ɔmu es wus a eke yefenyina wəl b'esŋ Turki a ec'eb eb ab em a (1.1).

Ke ləgŋ na em a, ɔmn esel a ek'any yogŋ a ɔbr gbre ijr. Ow sosiem anake Pier nɔn ləl na awŋ el eke k'atr el sos es, gbre ijr a eke -l'ɔbar a sosiem a. Nuŋ 1.2-12 em a, n'am ɔkn wəl eke Nyam b'ow eb elu el es etŋ ow ew el aja ligbəl nyam es afr. Ləgŋ es abal el em a eke Jesu b'ow ewl ow a anake -li b'ow -n'eyŋn aja na a. Ow sosiem n'am dad wəl eke wəl k'ony ɔmn, ke wəl ínym es kikri es abur fəŋ ec'any af.

Nuŋ 1.13 toŋ nuŋ 2.10 em a, Pier am ɔkn el eke Nyam in ibrm eke we'n ki kok sayl owi. Nuŋ 2.11 toŋ nuŋ 5.19 em a, n'am ibrm eke wel k'ony es an mamn agɲ a ek'onym ɔmn a ec'araɲn lele wel ɔfr em ab. N'am ibrm eke wel k'eb Krist eke kokm low ɔbr kaka, ke eben yeji wel ijr gbre a e lakr a.

Lɛl a ec'uwɛr em a (5.1-14), n'am ɔm ɔmn esɛl a lele idr esɛl ab ab ów.

Esɲn

¹ Em Pier, Jesu Krist ec'erm es, em anake m'am awɲ agɲ a eke Nyam sɔsum ot a lel na a, el a eke ɔmu es, † ke am ir eb esɛ etu agɲ af, Pɔɲ, Galasi, Kapadɔs, Azi lele Bitini wus ab af a. ² Nyam Es, ikɲ anym sɔsum ot ɔny esɛ elel eke li bebm l'ew es ab af. L'ecr in ec'Abɲ ab em li kok ɔny eel agɲ lala, yec'etɲ ke élumn Jesu Krist, ke in eci mebl a áyal ɔny. † Ke Nyam ec'owɛɔ a lel erm es ey ab ab ény bobn ɔny.

Si kóklmn Nyam ek'ecr Jesu Krist em elu sel eɲn ɔkm a

³ Si kóklmn Nyam, ey Es Kɔtɔkɔ Jesu Krist ec'Es! In eci sɔɲɲ ikɲ ligbel ab em, n'ɔɲ wel ewɛ ey em Jesu Krist eci luw em ek'anɲ igb a sosisem. Nene em anake s'am ɔmn low a eke b'ɔɲ ey s'anɲ owɛr a, ⁴ etɲ s'ɔtu eke sos em inɲ em, si k'eku aja

† **1:1** *el a eke ɔmu es:* legɲ ab em odad ebl a ek'anɲ Grek eci silel ejec'em a, bi yegm Jwifel ek'irm Palestin wus af a. Kɔ aɲa ec'a odad ebl na el Krist e jam us esɛl ek'ɔmu es wus nimum af a eci. (Bèbmɲn Jak 1.1 lel ow ec'akr otar ab ab.) † **1:2** *Èkn ɔkm Ok* 24.3-8; Ob Ap 16.14-15; Ebre 9.22.

a eke Nyam ew es in ec'agh ec'a. Aja a, l'oc l'ew ony es afr, yogh a eke ow k'otum unjm, ikpim, iram a. ⁵ Etn ony obi a, eke ubr nawre a sosiem, Nyam ek'onny abusu a b'wsu ony, ony e sog eci. Sel ehn ikh na, wel b'ow uw'r any segh es abal el em a.

⁶ Na sosiem sos em inhn iy ony em gbony, ek'ow it eke yefenyina em ses babur akpasu akpasu a k'owr ony sos es segh tel eci yeji. ⁷ Ses babur amua b'elum ony ec'omn e sakpl a abu ey okm. Sika otu eke k'un, eben yeji wel b'oc elu'l alm, wel ekn eke l'el can. Ony ec'omn a ec'a yeji eben. L'il an l'akm sika, gbekw in yeji li b'ecr ebn ekn em. Na sosiem anake, legn a eke Jesu Krist b'ow ey okm a, b'ow ehan es susm, koklm lel anygbel ab ony ec'omn a e sakpl a sosiem a. ⁸ Ony, Jesu eknmn in etn eben yeji b'erurir ir. Ony, eknmn in caca em a etn eben yeji b'onyn omn in em. Na sosiem anake sos em inhn ligbeliy ony em a, sos em inhn ligbel eke wel k'otum dadm ow e low. ⁹ Sos em inhn ikh na onyn anke wel sog ony. Na el ob ap a eke b'ehan eke ubr Jesu nawre a sosiem.

¹⁰ Sel ehn ikh na, kokoba ob esel ol es etn tutr in e lis e low. -L'ikh anym -li dad ob ap a eke b'ow ehan a e low. ¹¹ Krist ec'Abh a anh el em, etn ikh anym ewar Krist eci gbre fenh eke b'ow ij a lel ow ec'anygbel eke b'ow ign ab ab. † Kokoba ob esel a ol eke k'uw legn ab af eke ow amua k'ey a, lel ow ec'elel eke ow k'owr ab ab any. ¹² Etn Nyam yegm el eke: odad a eke we'n am ob ow e kokoba a, ow'n elm wel eci, kw ony eci. Sica,

† 1:11 Ekn Selu 22; Esayi 53; Luk 24.25-26.

agη a ek'am ob Amani Mamn a eci kokoba a, cec ony odad a Abη Lala a ek'annη afr ow a ec'abusu em. Etη odad na, afr erm esel el obi yeji erur eke k'epi meny es em.

Lala em ec'es an

¹³ Ow sosiem, bēbmn sos low kok eci ke áηηn any owr. Òcr ony eci low omn a nimum elul bibm a eke b'ow eηan ab em, legη a eke Jesu Krist b'ow ey okm a. ¹⁴ Elumn Nyam ke kí kokmn legη sig em ec'onny ec'ów aw a ek'annη ony em, gbuη ke uwr Krist any a e low. ¹⁵ Èel lala ony ec'es an nimum em, ese elel eke Nyam ek'esη ony a el lala ab af, ¹⁶ anke Nyam Lel em wel non: *Èel lala, anke m'el lala.*†

¹⁷ Ony eci Nyam ηonη em a, ony b'esηη Nyam ony Es, in eke li bi jej eηη fēη e low l'ok nenyembri nyam em, eηη eηη ec'elel eke kokr ab em a. Ow sosiem, iir eb Nyam eci muru em seηη a ek'annη ony eke k'annη wus af anηa. ¹⁸ Ony lagηel ec'elel eke b'iir eb ke ebr a, low kaka anm em. Gbeko ony uwr any eke Nyam enm ob ligbel etη oc soηr ony eb ir akpasu na em. Etη ow elm ob eke b'un esē sika af oglog ese jete em af li soηrm ony. ¹⁹ Kō Jesu Krist eci mebl ek'il an ab em li soηr ony. In eke l'el egb waw ek'annη ese licebli ek'onym low obr ke itam em af a. ²⁰ Nyam ikη anym bēbm ew'r es gbuη etη kok wus nimum etη ony eci nimamn sosiem, l'elu ow okm seηη na ek'el seηη es abal el ab em. ²¹ Krist em anake b'ubr Nyam ek'igbm'n luw em ke on'n anygbel a nawre a. Kin low a sosiem eke b'ocr ony eci

† 1:16 Ob Ap 19.2.

nawre ub a lel ony eci low omn ab ab elul Nyam em a.

²² Ony eci low nenyembri nyam ec'elum a ayal ony eke k'eruririr nawre em tasi ese ony lisijimel ofr ce af. Ow sosiem, eruririr tasi em ony ofr erm lala em. † ²³ Ony wel ewr ony em etj em ewr owr na anm ob eke b'uw em owm, ko ob eke k'otum uwm em. Ee! Ony wel ewr ony em, Nyam ec'odad ebl a eke b'onj egn sel ke anj segn fej ab em. ²⁴ Nawre, anke Nyam Lel dad nine:

agn fej anj ese suw af,
etj low fej eke b'onj el -n'onj any a,
anj ese ogm suw dodo af.

Suw b'uw es etj suw dodo bi kpab ey,

²⁵ ko Es Kotoko ec'odad ebl a anj segn fej.†

Odad ebl na el Amani Mamn a eke wel ob ok ony a.

2

Lebn a ek'anj owr a lele Nyam ec'agn ab

¹ Oggn low fej ek'el low njn, yadn ony, enyembri yony yony, nyamneyr lel egn cak cak ab. ² Ese ey abu em eke wel ew af, erurir Nyam odad ek'el meny mij mamn a, yec'etj ke in ec'egj em a, agbr ke enan sel. ³ Tasi em a, Nyam Lel dad nine: *ony, tatr Es Kotoko anm ekan in e sided a.*†

⁴ Owr titmn Es Kotoko ek'el lebn a ek'anj owr ke agj ign elu es a, Nyam solum oc'r, l'ekn eke ow el sobo in ec'any af. ⁵ Ony yeji, ese mebn ek'anj owr af, ebr usu Abj Lala ec'el a ec'us

† **1:22** *erm lala em*1 Pier eci silél esig oglog ec'a: *erm fej em.*

† **1:25** Esayi 40.6-8, Septant em ec'odad eke wel oc. † **2:3** Selu 34.9.

ab em. Ow b'ow ɔŋ okar af eel egb waw esel ec'eb eke wɛl ot ok saw, Nyam e juma kok eci, etŋ b'ow kokr segb waw Nyam ec'Abŋ a ec'erur em, etŋ Nyam b'ow eb Jesu Krist sosiem. ⁶ Etŋ kin yec'eke Nyam Lɛl dad:

Mi sɔsum lebn sɔbɔ ek'il an m'oc,
etŋ mi b'ow m'ew'r es Sion † eb em esɛ lɔy em
eci lebn af;

etŋ egŋ yec'eke b'oc ɔmn elu'l em a,
sos k'ow ɔwm es legŋ kaka.†

⁷ ɔny ek'ubr nawrɛ ec'a, lebn na il an nɔnɔ ligbel;
kɔ agŋ ek'ubm nawrɛ ec'a lebn ɔfr ɔfr cɛ ow el:
lebn a eke êl us esel igŋ elu es a
ɛwl mɛny el êl lɔy em e lebn tasi,

⁸ etŋ l'el lebn eke b'eb agŋ akr
lob eke b'elu egŋ wus. †

-L'ok wus anke -l'egŋm -l'ubm Nyam ec'odad a
nawrɛ, etŋ na el low a eke Nyam bebɛm el ec'a.

⁹ Gbɛkɔ ɔny, eel agŋ a eke wɛl sɔsum ot a, Eb
ebu a ec'egb waw esel a, agŋ a ek'el Nyam ec'a.
ɔny eel agŋ a eke Nyam sɔsum ot eke k'ɔb ów
egbel a e li kok a ec'amani. In l'esŋ ɔny eke k'okr
ɔkm ncebn em, ke li nyímn ɔny in ec'usuayl sɔbɔ
ab em. † ¹⁰ Legŋ sig em a, ɔny elmn Nyam ec'agŋ,
kɔ yefenyina em a eel in ec'agŋ ŋ. Legŋ sig em a,
Nyam ɔnym ɔny eci sɔrŋ ikŋ, kɔ yefenyina em a
n'ɔny ɔny eci sɔrŋ ikŋ. †

† **2:6** Sion:el Jerusalem ec'eb a e nin. † **2:6** Esayi 28.16, Septant
em ec'odad eke wɛl oc. † **2:8** Selu 118.22; Esayi 8.14. † **2:9**
ɔkm Ok 19.5-6; Esayi 43.20; ɔkm Ok 19.5; Ol ɔkn 4.20; 7.6; Esayi
43.21; 9.1. † **2:10** Ose 1.6,9; 2.1,23,25.

*Չոյն es an nyim nyim agղ eke elm nawրe ub
esel a ec'araղn*

¹¹ Erur em ec'agղ lisijimel, Չոյ eel etu agղ ek'ir wus af aղa lեղղ tel eci. Ow sosiem m'am dad Չոյ: k'usr Չոյ ec'ow aw enղn a eke b'ogղ Չոյ eci liy mum a jam. ¹² Agղ ek'uwm Nyam any ec'araղn a, Չոյն es an nyim nyim, yec'etղ ke eke -li cicr Չոյ yadղ em ek'ոյ kokr ow enղn, ke -l'otu -l'եղղ -l'eb -l'եkn Չոյ ec'ow amamn a, ke lեղղ a eke Nyam b'ow ow a, -li koklm ow ec'anygbel a.

¹³ Elumn abusu esel Es Kոtոkո sosiem, ke elumn eb ebu a aղke l'el agղ a fեղ ec'es ew, ¹⁴ ke elumn in eci kpama esel eke l'abul ow enղn kok esel eci low ob, lel agղ amamn ec'aw a yeղi.

† ¹⁵ Yec'ek'el Nyam ec'erur a el ke Չոյ ec'ow amamn kok a abl agղ ek'uwm low any eci nyamb ij a neny es. ¹⁶ Aan es esե ewi af gbեkո, ke Չոյ eci lewi ij a k'elm gbad eke b'ocr lool ow enղn es. Kո Չոյն es an ek'el Nyam ec'obowi ec'es an. ¹⁷ Չոյն eղղ fեղ ec'elumn. Erurir Չոն em ec'ոյ lisijimel a, Չոյն Nyam eci muru ke elumn eb ebu a. †

Aղղ juma kok esel lele es ew esel ab

¹⁸ Չոյ, aղղ juma kok esel a, elumn es ew esel eke bi kokr el e juma a es is em. Etղ ow elm el a ek'ոյ erm mamn ke el frոrո a ce k'eluamn, kո el a ek'el agղ tuոtuո a yeղi. ¹⁹ K'aw ke Չոյ am iղr gbre ek'itamn eke k'ijr a, aղke erurir eke k'eel cece Nyam eci. Eke ow el ebեn ke low senyn senyn ana. ²⁰ Tasi em a, blel ow el lowղn kokr,

† **2:14** Bèbmn Rom 13.1-7. † **2:17** Nyandre 24.21.

ke bogŋ ec'any ij b'ow eŋan ek'egŋn ebr am ijr gbre ee? Kɔ ek'am ijr gbre low eku em, low mamn eke kokr a eci, ke ow el low senyn Nyam ec'any af. ²¹ Tasi em a, low na ec'anake Nyam eŋɔny a, anke Krist in obi yeji l'ij gbre ɔny eci, etŋ l'ew ɔny sɛwl es, yec'etŋ ke ébr in e lakr a. ²² *In li kokm sikpl kaka etŋ in e nenym meju owi anm eym ɔkm.*† ²³ In, eke wɛl wɛwr'r a, li wɛwrm eŋŋ; eke l'ij gbre a, l'ijm luw l'okm eŋŋ kaka af, kɔ l'oc in ec'omn a l'elu Nyam eke bi jej low ok nenyembri nyam em ab em.

²⁴ Olikŋ ab af,

Krist in obi oc ey e sikpl a ubu sos af,
yec'etŋ ke sikpl ec'a s'úw,
ke s'ír eb nyim nyim eke b'akpl Nyam sos em.
In ec'abi a anake ewlm ey a.

²⁵ Tasi em a, ɔny anŋn eŋe mɛceb ek'irm af, kɔ sika ɔny ewal meny owr mɛceb ɔsu es † a eke b'ew ɔny eci liy nyamn af a ogŋ.

3

Ɔyɔw lel el ecɛl ab

¹ Ɔyɔw, ɔny ec'a, ɔnyn es is ɔny ecɛl e lís, yec'etŋ ke ek'el em a agŋ nyam nyam anŋ ek'ubm Nyam ec'odad a nawrɛ, ke ɔny ec'es an mamn em, -n'ɔny ɔmn, ow k'elm odad ebl em, ² anke -li b'ow -l'ekn elel ek'ɔny ec'es an a el lala lele elum em ab a. ³ Ɔny eci sakpl a itm eke k'el sos af eci cɛ: eŋe sin ec'ɔtu mɛwl em, sika em

† **2:22** Esayi 53.9. Akr 22 tonj akr 25 ab, am elu Esayi 53 ec'odad eke dad libowi a eke b'ow ij gbre a e low ɔkm. † **2:25** mɛceb ɔsu es:Luk 15.3-7; Jan 10.11; 1 Pier 5.4.

miyob lele mob sus em ewi eci sus ab; ⁴ kɔ ke ɔny eci sakpl a él yec'a eke lɔl es ɔny em a. Erm frɔrɔ lele bɛtɛ ab anake el sakpl a ek'il an nɔnɔ ligbɛl Nyam ec'any af, ke íram a. ⁵ Lɛgɛ sig em a, ɔyɔw nawrɛ ub lisɛl ek'ɔny ɔmn Nyam em a, ɔny sakpl ikɛ na aɲke -li b'elum el ɛcɛl. ⁶ Ɛtɛ ɛsɛ Sara af, li b'elum Abraham ɛtɛ li b'ɛsɛtɛ ow: «Em ɛgɛ gbɛliy.» Sica, ɔny eel in ec'ɔyɔw oto, eke bi kokr low mamn ɛtɛ ɛgbmn low kaka fɛɛ es ɔnym ɔny ɛrɛɲ.

⁷ Ɔyɔw ɛcɛl, ɔny yɛɛji, ɔny ec'ɔyɔw ab ab ec'ɛb eke b'ow ir usu nyam a, ɛwr ɛl e lís e low any. Ow it eke k'uwɛr any ek'ɔyɔw el ob fuɛfuɛ. Kòkr ɛl e low ɛlum em † aɲke ɛsɛ ɔny af, -li b'ow -n'ɛɲɛ sel ɛɲɛ a eke Nyam b'ow ap ɔny a. Eke bi kokr ɛbɛn a, low kaka k'ow ɛdɛɲm ɔny e Nyam ɲɔɲɛn a fɛɛɲ.

Ɔɲr gbɛrɛ low nimamn eci, kɔ ow k'él low ɲɲ eci

⁸ Uwr em ec'a, ɔny fɛɛɲ ɔnyɛn nɛny af okr nyam, ikɛɲɛnɛn sɔrɛɲ, ɛrurir ɔny ɔfr ɛsɛ agɛ lisijimɛl af, ɔnyanin erm mamn, ke ɛgɛ ɛgɛ ís es lawl ec'any af. ⁹ K'òcr low ɲɲ k'ɔbarir low ɲɲ any; k'òcr wɛwr k'ɔbarir wɛwr any. Ow eke ki kokr a el: ke íbrmn Nyam ec'ɔwrɔ a ɛgɛ a eci, aɲke na sosiɛm eci Nyam ɛsɛɲ ɔny eke k'ɔɲ ɔny ɔwrɔ ɛsɛ aja af. ¹⁰ Kin yec'ɛke Nyam Lɛl dad:

Ek'ɛgɛɲ nyam am erur eke k'ɔny ɛb ir mamn,
ke úw ehe e sɛgɛɲ any a,
ow it eke li k'ɛdɛɲ in ec'anm a ów ɛɲɲ e dad,
ke l'édɛɲ in e nɛny a yadɲ ec'ɔny.

† **3:7** Efɛs 5.25; Kolɔs 3.19.

11 Ow it eke li ki kpab es low ñuñ e lís,
li kok low nimamn ke l'ól erm es ey es low any
at em.

12 Li kók eben, aṅke Es Kótoko ec'anyamn a anñ
in ec'ey a eke b'ony es an mamn ab af,
etñ in ec'oru a b'iri el eci ñoñ ebl a;
gbekó agñ a eke bi kok ów enuñ a li b'atar wél
ab. †

13 Ek'ony ec'erm feñ em am òl low nimamn
eci kok es, ke bwo ec'egñ b'ow kok ony low ñuñ
ee? 14 Etñ eke, legñ nyam low nimamn eci kok
sosiem am ijr gbire, ke ehe él ony eci! *K'ònyñ agñ
eci muru etñ kì yebr erm mij kok ony!* 15 Gbekó
ony ec'erm em a, sùsmn Krist sony ce es, eke l'el
ony eci Kótoko a.† Seḡñ feñ, bèbmñ otarir ony
e low òmn a ek'onyn a e low akr ókr agñ a eke
b'ow ibrm ony a. 16 Gbekó, ke ow él bete bete lel
elum em ab. Ke ony ec'ów tutr em a abr enym
k'ánm, yec'etñ ke agñ a ek'am onyn ony yadñ a,
ony ec'es an mamn Krist e jam us em a, és ók any.
17 Ow akpl eke tasi em a, k'ij gbire low nimamn
e kok em, eke ow el Nyam ec'erur, ow a eke k'ij
gbire low ñuñ e kok em a.

Krist ij gbire eb any oñ ey

18 Tasi em a, Krist in obi ij luw e gbire agñ e sikpl
a nuñ af, akp nyam coco ce eci; in eke l'el ñeny
nyam es a, l'uw ów enuñ esel sosiem, yec'etñ ke
l'ót n'im ony Nyam oñ. In, l'uw sos megl e luw,
gbekó Abñ Lala ewl meny oñ'n owr anñ. 19 Ow
em a, n'im n'òmun in ec'any eb ec'amani ab es

† 3:12 Selu 34.13-17, Sèptant em ec'odad eke wél oc. † 3:15
Bèbmñ Esayi 8.12-13.

† l'ok abη a fηη ek'annη sobel em a. ²⁰ Ow el el a eke lεγη sig em a obr Nyam any a. Nyam on in e low eku a am ibn, lεγη ab em eke Noe am kok mijetη ligbel nyam a. Agη tel ce anake ok mijetη ab em, ke ecr mij em eci eηη sel a; el fηη -l'ij agη niwn. ²¹ Ów amua el mij ok nuη a eke b'onη ony sel yefenyana em a eci meny ewr. Mij ok nuη na elm ey e sos megl af e sikpl a ec'es yoyog eci, ko ke εγη eb ocr η nimum elul Nyam em, ów tutr ek'onym abr enym em. † Eηη mij ok nuη na otu el, Jesu Krist e luw em ek'igb a sosiem. ²² L'uyu afr, n'annη Nyam e lidr abu af. Sica n'onη lec l'akm afr erm esel fηη, lele mob fηη ek'onη es ew lel abusu ab a.

4

Igηη sikpl owi elul es

¹ Eke Krist ij gbre in e sos megl em a, ony yeji bεbmn sos tutr nenyembri nyam ab em, anke εγη yec'ek'ij gbre in e sos megl em a onym low sikpl ab. ² Σεγη ek'annη ony eke k'iir eb wus af anη a, k'usr agη ec'ów aw enuη a jam, ko usr Nyam e low e b'erur a jam. ³ Εε, lεγη ek'ec ab

† **3:19** *Ow em a, n'im n'omun in ec'any eb ec'amani ab es l'ok abη a fηη: odad na Grek em a wel otu eke k'itηη ejec'em dad ese: Abη na ab, n'im toη li dad odad l'ok abη a fηη...* Ow otu eke k'el agη a ek'εgηm irim Noe ec'ewar a, ke uw a ec'abη; oglog agη beb bi tutr ek'ow el afr erm esel ek'obr Nyam any, ke is erm suη owi a ek'onη Nyam ηuηη wus mij gbη ab em a, ec'abη a. Bεbmn Nuη Ob 6.1-8; 2 Pier 2.4-5; Jud 6. † **3:21** *ko ke εγη eb ocr η nimum elul Nyam em ów tutr ek'onym abr enym em: odad na Grek em a wel otu eke k'itηη ejec'em dad ese: ko ke íbrm Nyam ayal η ec'ów tutr a.*

εμ a, kokr sakp nɔnɔ agɲ ek'uwɔm Nyam any a e low e b'erur a. ɔny iir eb εσε elel ek'erurir ab af, ɔnyɔn ów aw eɲɲ, eel mar εɲɲ. Eel ob iju εtɲ b'igɲɲ sinyam yadɲ ek'el nɛɲɲɲ e mob a nuɲ. ⁴ Jam aɲa, agɲ amua low am iti any. Úsmɲ el jam ij, ánmɲ el e ec'eb ir suksuk owi ab εm ij, εtɲ -li bi wɛwr ɔny. ⁵ Gbɛkɔ -li b'ow -l'ayal el ec'ów amua fɛɲ -l'ok Nyam ek'inym es eke ki jej agɲ ek'anɲ owr lel agɲ ek'uw ab ab e low ok a. ⁶ Na sosiεm anake wɛl ɔb Amani Mamɲ a ok agɲ a eke caca εm uw a yej'a. Εβɛn a, eke -l'uw εσε agɲ fɛɲ af sos meɲl e luw a yeji, ke sica -l'ɔtu -l'ir eb, εσε elel eke Nyam am erur ek'agɲ k'ir eb ab af, Abɲ Lala ec'abu εlum εm.

Àɲɲɲ εσε Nyam e juma kok εσεl amamɲ af

⁷ Ow k'ow ibnɲ εtɲ ow b'ow el low fɛɲ e nuɲ. Ow sosiεm iir eb sos es ok εm, ke any ok ɔny es, yec'εtɲ ke ɔtur ɲɔɲan Nyam. ⁸ Low tasi eke k'ikɲɲ anym kokr a el, éruririr ɔny ɔfr ɔny ec'erm fɛɲ εm, aɲke *erur bi tɛtɲ sikpl nɔnɔ es.*† ⁹ Èbr agɲ eke b'ow ɔny akɲ a, ke ow kakl k'ánm εm. ¹⁰ Ke εɲɲ εɲɲ ec'ob ap ek'εɲɲ Nyam e lís a, l'óc li kokr lawlɛl a fɛɲ e low. Àɲɲɲ εσε juma kok εσεl amamɲ eke b'ɔsu Nyam ec'ob ap eɲ eɲ ab af. † ¹¹ Ke εɲɲ ek'εɲɲ ob ap ek'el Nyam odad ec'a, él Nyam e nɛny af odad εs. Ke εɲɲ ek'εɲɲ ob ap ek'el abu εlum ec'a, kók abu εlum εs e juma lɛc a eke Nyam b'ɔɲ'n ab ab. Εtɲ Nyam b'ow εɲɲ

† **4:8** Nyandre 10.12; Jak 5.20. † **4:10** Nyam ec'ob ap eɲ eɲ; bɛ̀bmɲ Rom 12.4-8; 1 Korɛnt 12.4-11, 27-31.

anygbel low fɛɲ ɛm Jesu Krist sosiɛm. In ec'él anygbel lel abusu ɔny ab sɛɲɲ fɛɲ! Amen.

Sos ɛm iɲn gbɛɛ ij ɛm

¹² Erur ɛm ec'agn lisijimɛl, ow k'ɛw ɔny any iti, ɛsɛ low ek'okr ɔny es af! Ek'anɲn ɛbm ɛkn eke b'otarir es ɛsɛ al ɛm eci ɛcr ab af. Al na anake b'ow ɛlu ɔny ec'ob ek'eel a ɔkm a. ¹³ Eke tasi ɛm anɲn Krist eci gbɛɛ ij a e low ɛm, ke ànɲn sos ɛm iɲn ɛm, yec'ɛtɲ ke lɛɲɲ a eke b'ow ɛkan in ec'anygbel a yɛji, ànɲn ehe lele sos ɛm iɲn ligbel ab ɛm. ¹⁴ Eke wɛl bi wɛwr ɔny eke eel Krist eci jam us ɛsɛl a sosiɛm, ke ɔny ec'a ehe ligbel ana! Anke Nyam ec'anygbel ec'Abɲn a anɲ ɔny af!

¹⁵ Ke ɔny ɛm ec'ɛɲɲ kaka k'íjɲm gbɛɛ ɛɲɲ e l'ibi, mil e liy, low ɲɲɲ e li kok oglog ɛɲɲ ec'ów eke l'igb l'ɛy ɛm sosiɛm eci. ¹⁶ Kɔ ek'ɛɲɲ nyam am ij gbɛɛ kɛɛtɛn e l'el a sosiɛm eci, ow itm eke ɛs k'ɔny'n; kɔ ke nana n'ónɲ Nyam bia eke li k'ɔtu l'ij nin na. ¹⁷ Anɲ anake el jɛj ok a e nɲɲ ɔb a, ɛtɲ ow ɔb nɲɲ Nyam ec'agn ɛm. Sica eke l'ɔb nɲɲ ɛy ɛm, ke agɲ a ek'ɛɲɲm ubm Nyam ec'Amani Mamn a nawɛ ec'a, ayaf ow b'ow ɛcr ab ee? ¹⁸ ɛsɛ elɛl eke Nyam Lɛl dad ab af: *Ek'ow ɛw tuɔtuɔ eke ɛɲɲ nyim nyim k'ɛɲɲ sel, ke ayaf ow b'ow ɛcr ów ɛɲɲɲ ɛsɛl lele sikpl ɛsɛl ab ec'ab ee?*†

¹⁹ Ow sosiɛm agɲ a ek'am ij gbɛɛ Nyam ec'elɲm sosiɛm a, it eke k'ocr ɛl sosi ɛlul Nyam ɛl e Kok ɛs ek'el ɛɛɛ a abu ɛm, ke -l'ucu low mamn kok -n'ɔny es.

† **4:18** Nyandre 11.31, Septant ɛm ec'odad eke wɛl oc.

5

Agɥ ekpekp a lele kretiɛnɛl a fɛɣ ab ec'ow om

¹ Sica, agɥ ekpekp a ek'anɣ ony ab ke bi nyimn Nyamel a anake m'am dad odad a. Em obi yeji m'el eɣɣ likpekp eɛe ony af. M'el Krist e gbre ij a e danɣu, eɣɣ mi b'ow m'anɣ anygbel a eke b'ow eɣ okm a e low em. ² Eɣɣ kin yec'eke m'am dad a: èwr mebob eke Nyam abul ony a e low any. K'èwr el e low any eɛe atrm em af, kɔ erur tasi em, eɛe elɛl eke Nyam erur ab af. K'èwr el e low any os eɣɣ sosiem eci, kɔ eke eɣɣ ebr a sosiem. ³ Agɣ a eke Nyam abul ony a, k'èwr es ew lɛc lɛc el ab; kɔ èel mebob a e sɛwl, ⁴ yec'eɣɣ ke lɛɣɣ a eke mɛceb osu eɛel ec'Es Ew Es a b'ow ow a, † éɣɣan ob ap ek'el anygbel e tufe eke írmm in eci jejn a.

⁵ Nɣbafre, ony yeji, èlumn agɣ ekpekp a. Ony fɛɣ, isr es ewr ekekey ony lawlɛl ec'any af, anke Nyam Lɛl dad ninɛ: *Nyam b'ow agɣ eke b'ew sos a abr; kɔ li b'elu in ec'erm mamn okm agɣ eke b'is es a e lís.* † ⁶ Ow sosiem, isr es ewr ekekey Nyam e lɛc a ec'ew, yec'eɣɣ ke lɛɣɣ a eke l'ew ab af, n'ony l'igbl ony oɣɣ. ⁷ Òcr ony ec'erm mij ebr fɛɣ elulil Nyam abu em, anke li b'ew ony e low erm.

⁸ Osur sos, ke áɣɣn any owr. Agɣ ek'el ony ec'ifnu a, eɛe kukuma eke am awɣɣn af, am did ony eɣɣ am ec ol eɣɣ eke k'emn es. ⁹ Inymn es kikri omn em ke ákmn in es. Ke úwr any ek'onɣ lisijimɛl ek'anɣ wus nimum af a, am ij

† 5:4 *mɛceb osu eɛs*:Luk 15.3-7; Jan 10.11; 1 Pier 2.25. † 5:5 Nyandre 3.34, Septant em ec'odad eke wel oc.

gbre nenyembri nyam εσε οny af. ¹⁰ Οny e gbre ij a b'ow ibn σεγη tel ce eci. Κο Nyam ek'in em bibm fεη ανη a, εση οny eke k'owr ανηη in ec'anygbel a ek'onym uwr ab em, Krist ab ec'af okr ab em. Ετη li b'ow li kok οny eel sobo, eel leg leg ke οnyn lec, ke sica wel k'otum οnym elum οny wus ij. ¹¹ In ec'el abusu οny σεγη fεη. Amen!

Εσηη es abal el

¹² Silas el εγη lisijim ek'el cεce. M'εcr in em mi non lel ikprli na, eke mi k'atr οny sos es ke mi yεgm οny tasi eke Nyam ec'owro a tasi anake ucur οnyn es a.

¹³ Agη a fεη ek'ann Babilon anη, ke Nyam sosome ot εσε οny af a, el fεη am εσηη οny, em jim Mark yeji. † ¹⁴ Εσηηninin οny ofr, af eyarir em lel erur em ab.

Εrm es ey el οny fεη ek'okar af Krist em a eci!

† **5:13** *Babilon:* agη beb bi tutr ke Rom ec'eb a. *Mark:* Πier ec'a, Mark el in ec'omn em ec'iy.

Amani Owr
Adioukrou: Amani Owr New Testament

copyright © 1998 Wycliffe Bible Translators, Inc.

Language: Adioukrou

Contributor: Wycliffe Bible Translators, Inc.

All rights reserved.

2020-11-10

PDF generated using Haiola and XeLaTeX on 21 Feb 2024 from source
files dated 29 Jan 2022

b20fd1e5-39e1-5678-9af9-b99e1ebfb994